

Apresiabel habitante di Hulanda,

Hopi hende na Hulanda ta haña un trato diferente pa motibu di ken nan ta. Nan ta enfrentá diskriminashon i rasismo. Por ehèmpel pa motibu di nan koló, nan seksualidat, òf nan fe. Esei tin konsekuensianan grandi. Por ehèmpel, ku hende no ta sinti nan seif. Òf ku nan ta sinti ku nan no ta pertenesé. Esei por pone ku nan tin ménos konfiansa den otro hende i den gobièrnu. Mester kambia esei! Den e karta aki bo por lesa kiko e Komishon di Estado kontra Diskriminashon i Rasismo (staatscommissie tegen Discriminatie en Racisme) a hasi kaba. I kiko gobièrnu por hasi. I abo mes.

Investigashon tokante diskriminashon i rasismo

Tweede Kamer a sòru ku a lanta e Komishon di Estado kontra Diskriminashon i Rasismo. Komo komishon di estado, 4 aña largu nos a hasi investigashon tokante diskriminashon i rasismo rònt Hulanda. Pues na Hulanda Karibense tambe. Tambe nos a investigá kon gobièrnu ta anda ku diskriminashon i rasismo. I kiko mester kambia. Nos a papia ku hopi hende: habitante, organisashon sosial, sientífiko, ámtenaar, i mandatarario. I awor nos trabou a kaba. Nos a traha un informe final tokante tur nos investigashonnan.

E resultadonan di mas importante

Diskriminashon t'ei tur kaminda, asina a resultá for di nos investigashon. No ta hende so ta diskriminá. Diskriminashon por ehèmpel tambe por ta skondí den leinan òf den maneho. Algun grupo di hende tin di haber ku esaki mas tantu ku otro gruponan. Tin biaha no ta ni sikiera kla mesora pakiko. Esei por ehèmpel tabata e kaso ku e Toeslagenaffaire (Un skandal polítiko i atministrativo grandi na Hulanda Oropeo tokante kompensashon pa akohida di yu). Únikamente despues di investigashon a bin dilanti ku tabata diskriminá mayornan pa motibu di nan entrada òf nan nashonalidat.

Diskriminashon ta eksistí hopi tempu kaba i e aserkamentu di esaki no ta bon. Kon bini? For di nos investigashon a resultá ku hopi hende ta sinti ku gobièrnu no ta skucha nan sufisientemente bon. Esei ta konta partikularmente pa hendenan ku ta eksperenshá diskriminashon mas biaha. I tambe pa habitantenan di Boneiru, Sint Eustatius, i Saba. No tin suficiente hende for di tur grupo di sosiedat ta traha serka gobièrnu. P'esei, hopi biaha ta lubidá problemanan di algun grupo.

Tin un problema mas. Awor, generalmente gobièrnu ta hasi algu despues ku a diskriminá un hende kaba. E ora ei, e hendenan mes mester mèldu esaki òf nan mes mester bai korte. Gobièrnu mester sòru ku no ta diskriminá hende. Pues mester prevení diskriminashon.

Ademas, polítikonan i mandatarionan ta hasi muchu tiki. Muchu tiki biaha nan ta ekspresá ku diskriminashon ta robes. Dor di esei ta parse ku diskriminashon ta birando kada bes mas normal.

Kon por mehorá esaki?

Nos ta haña ku e aserkamentu di diskriminashon mester kambia. Ta importante pa rekonosé i prevení problema. I pues, no pa intervení ora kos a bai robes kaba. P'esei nos a desaroyá solushonnan práktiko pa gobièrnu. Gustosamente nos ta duna bo 3 ehèmpel:

1. Nos ta haña ku gobièrnu mester introdusí e Obligashon Igualdat Sektor Públiko (Gelijkheidsplicht Publieke Sector). Awor, lei ta protehá hende despues ku a diskriminá nan kaba. I e hendenan mes mester proba esei. Nos ta haña ku mester kambia esaki. Ora di traha maneho nobo, gobièrnu mester pensa bon mesora: e maneho aki ta trata hende honesto i hustu? I pues no despues.
2. Nos a traha un prueba di diskriminashon pa gobièrnu. Gobièrnu por usa esaki pa investigá si e maneho i e reglanan ta diskriminá. E prueba di diskriminashon tambe ta yuda gobièrnu pa papia ku habitantenan tokante esaki. I pa mehorá maneho i reglanan. E promé eksperensianan ku e prueba di diskriminashon ta mustra ku nan ta funshoná bon. Mas ku 40 organisashon di gobièrnu tin gana di kuminsá traha kuné. I tin hopi otro organisashon ku ta hasi esei kaba. Nos ta kontentu p'esei!
3. Nos ta haña ku gobièrnu mester usa métodonan honesto pa kontrolá hende. Gobièrnu ke sa kuantu hende e mester kontrolá èkstra. Por ehèmpel tokante froude. P'esei mas i mas, gobièrnu ta usa sistemanan di kòmputer kompliká i hopi datonan di hende. Por ehèmpel tokante edukashon, kódigo postal, i edat. Aki e riesgo di diskriminashon ta grandi. Pasobra pa algun grupo di hende e chèns di kontrol èkstra ta mas grandi. Nos ta haña ku gobièrnu mester stòp di hasi esaki ora e chèns pa kometé eror ta grandi. Gobièrnu mester usa métodonan honesto, manera kontrol arbitrario. E ora ei, e chèns di kontrol ta mes grandi pa tur hende.

Nos mester di bo yudansa tambe

No ta gobièrnu so mester lucha kontra diskriminashon i rasismo. Tur hende na Hulanda tin un tarea importante tokante esaki: polítikonan, mandatarionan, medionan, empresanan, i habitantenan. Pues abo tambe. P'esei, bisa algu ora ta diskriminá un hende. Òf mèldu esaki. Pasobra tur hende tin derecho riba un trato igual. Tin hopi trabou pa hasi ainda. I kambio ta tuma tempu. Pero huntu nos por sòru ku trato igual no ta keda na un promesa bunita riba papel. Tur habitante di Hulanda mester ripará esaki den nan bida. Bo ta djòin?

Un saludo kordial,

Komishon di Estado kontra Diskriminashon i Rasismo